


胡子知言 一之三





					漢書門
				九三七四	
				二四九	
				冊架函號類	

庫文閣內		
函	九三七四	漢書
冊架	二四九	冊架函號類

內閣文庫	
番號	漢 9374
冊數	2 (1)
函號	298 290

儒家 三二



298-290

胡子知言序

知言五峯胡先生之所著也先生諱宏字仁仲
文定公之季子也自幼志於大道嘗見揚中立
先生于京師又從族師聖先生於荆門而卒傳
文定公之學優悠南山之下餘二十年玩心神
明不舍晝夜力行所知親切至到析太極精微
之蘊窮皇王制作之端綜事理於一原貫古今
於一息指人欲之偏以見天理之全即形而下
者而發無聲無臭之妙使學者驗端倪之不遠
而造高濶之無極體用該備可舉而行晚歲嘗

淺草文庫

古子矢序
被召旨不幸寢疾不克造朝而卒是書乃其平日之所自著其言約其義精誠道學之樞要制治之著龜也然先生之意每自以為未足逮其疾革猶時有所更定蓋未及脫藁而已啓手足矣或問於棡曰論語一書未嘗明言性而子思中庸獨於首章一言之至於孟子始道性善然其為說則已簡矣今先生是書於論性特詳焉無乃與聖賢之意異乎棡應之曰無以異也夫子雖未嘗指言性而子貢蓋嘗識之曰夫子之文章可得而聞也夫子之言性與天道不可得

而聞也是豈真不可得而聞哉蓋夫子之文章無非性與天道之流行也至孟子之時如楊朱墨翟告子之徒異說並興孟子思學者之惑而莫知所止也於是指示大本而極言之蓋有不得已焉耳矣又况今之異端直自以為識心見性其說誇張雄誕又非當時之比故高明之士往往徃樂聞而喜趨之一溺其間則喪其本心萬事墮弛毫釐之差霄壤之謬其禍蓋有不可勝言者先生於此又烏得而忘言哉故其言有曰誠成天下之性性立天下之有情効天下之動

而必繼之曰心妙性情之德又曰誠者命之道乎中者性之道乎仁者心之道乎而必繼之曰惟仁者為能盡性至命學者誠能回其言而精察於視聽言動之間卓然知夫心之所以為妙則性命之理蓋可默識而先生之意所以不異於古人者亦可得而言矣若乃不得其意而徒誦其言不知求仁而坐談性命則幾何其不流於異端之歸乎棧頃獲登門道義之誨浹於中自惟不敏有負夙知輒序遺書貽于同志不韙之臯所不得而辭焉 門人 廣漢張棧

胡子知言目錄

- 第一卷 天命 修身 陰陽
- 第二卷 處窮 往來 仲尼
- 第三卷 文王 事物 紛華
- 第四卷 一氣 義理 大學
- 第五卷 復義 漢文
- 第六卷 中原

右五峯先生知言一書傳於世實甚久允後學之自伊洛者皆知敬信服行如洙泗之有孔氏而吾鄉學者或未見焉做受此書於南軒先生謹誦諸同志汪伯虞銀朱以廣其傳異時吾黨之士有文詞者有學問者有才

處窮本
篇作好
惡

過者皆知以此道為終身根本之地。如蕭何之守關中，寇恂之守河內，則庶幾乎知所稅駕。不然吾懼其終身之無所歸也。新安後學吳倣書。

孟子以知詖淫邪道為知言。胡子之書以是名者，所以辨異端之言與吾聖人異也。揚墨之害不熄，孔子之道不著，故知言一書於諸子百家之邪說辭而闢之，極其詳焉。蓋以繼孟子也。學者誠能滾味其指，則於吾道之正且大異端之偏而小若辨黑白若數一二矣。蕭君定夫以其所藏真藁示余，敬拜而書其後。浦城後學真德秀識。

胡子知言卷第一

天命

胡子曰：誠者，命之道乎？中者，性之道乎？仁者，心之道乎？惟仁者為能盡性至命。

靜觀萬物之理，得吾心之說也。易動處萬物之分，得吾心之樂也。難是故仁智合一。然後君子之學成。

觀日月之盈虛，知陰陽之消息。觀陰陽之消息，知聖人之進退。

士選於庠塾，政令行乎世。臣學校起於鄉行，財出於九賦。兵起於鄉遂，然後政行乎百姓。而仁覆天下矣。

生刑輕則易犯，是故教民以無罪也。死刑重則難悔，是絕民自新之路也。死刑生刑輕重不相懸，然後民知所避，而風

姓
榕打荷授吳
同下做之

化可興矣

自三代之道不行。君臣之義不明。君誘其臣。以富貴。臣干其君。以文行。夫君臣相與之際。萬化之原也。既汨其利矣。末流其可禁乎。此三代之治。所以不復也。

堯舜禹湯。文王仲尼之道。天地中和之至。非有取而後為之者。也是以周乎萬物。通乎無窮。日用而不可離也。釋氏乃為厭生死。苦病老。然後有取於心。以自利耳。本既如是。求欲無弊。其可得乎。

爵位儀章。德之飾也。有德則為等威。君子之所欲。無德則器物而已矣。君子賤焉。

陰陽之升降。邪正之內外。一也。是故仁者。雖切切於世。而亦不求之。必行也。

寒暑之始終。天地之始終也。

拘於耳目間見者。衆人也。無典章法度者。釋氏也。安得其心。徧該流通。與論性命之理。而反之正哉。

一裘裳也。于冬之時。舉之。以為輕。逮夏。或舉之。則不勝其重。

一絺綌也。于夏之時。舉之。以為重。逮冬。或舉之。則不勝其輕。夫衣非隨時。而有輕重也。情狃於寒暑。而亂其心。非輕重之正也。世有緣情立義。自以為由正。大之德。而不知覺者。亦若是而已矣。孰能不狃於情。以正其心。定天下之公乎。

見善有不明。則守之。不固。或攝於威嚴。而失之。或沒於情恩。而失之。或亂於精微。而失之。或汨於末流。而失之。偉哉。孟氏之子。生世之大弊。承道之至衰。蘊經綸之大業。進退辭

受。執極而不變。用極而不亂。屹然獨立於橫流。使天下後世。曉然知強大威力之不可用。士所以立身。大夫所以立家。諸侯所以立國。天王所以保天下。必本諸仁義也。偉哉孟氏之子。

義者權之行也。仁其審權者乎。

道充乎身。塞乎天地。而拘於軀者。不見其大。存乎飲食男女之事。而溺於流者。不知其精。諸子百家。憶之以意。飾之以辨。傳聞襲見。蒙心之言。命之理。性道之置。諸茫昧則已矣。悲夫。此邪說暴行。所以盛行。而不為其所惑者。鮮矣。然則奈何。曰。在修吾身。

釋氏定其心。而不理其事。故聽其言。如該通。徵其行。則顛沛。儒者理於事。而心有止。故內不失成己。外不失成物。可以

憶此億

襲此習
道之例

道之二
當乙

贊化育。而與天地參也。

自反則裕。責人則蔽。君子不臨事而恕已。然後有自反之功。自反者修身之本也。本得則用無不利。

有毀人敗物之心者。小人也。操譽人成物之心者。義士也。油然而手。物各當其分。而無為者。君子也。

知人之道。驗之以事。而觀其詞氣。從人反躬者。鮮不為君子。任己蓋非者。鮮不為小人。

釋氏直曰。吾見其性。故自處以靜。而萬物之動。不能裁也。自處以定。而萬物之分。不能止也。是亦天地一物之用耳。自道參天地。明並日月。不用配鬼神者。觀之則釋氏小之為丈夫矣。其言夸大。豈不猶坎井之蛙歟。

仁者天地之心也。心不盡用。君子而不仁者。有矣。

萬物備而為人。物有未體。非仁也。萬民合而為君。有一民不歸吾仁。非王也。

天命為性。人性為心。不行己之欲。不用己之智。而循天之理。所以求盡其心也。

修身

胡子曰。修身以寡欲為要。行己以恭儉為先。自天子至于庶人一也。

道不能無物而自道。物不能無道而自物。道之有物。猶風之有動。猶水之有流也。夫孰能問之。故離物求道者。妄而已矣。

釋氏之學。必欲出死生者。蓋以身為己私也。天道有消息。故人理有始終。不私其身。以公於天下。四大和合。無非至理。

六塵緣影。無非妙用。何事非真。何物非我。生生不窮。無斷無滅。此道之固然。又豈人之所能為哉。夫欲以人為者。吾知其為邪矣。

道非仁不立。孝者仁之基也。仁者道之生也。義者仁之質也。未能無欲。欲不行焉。之謂大勇。未能無惑。惑不苟解。之謂大智。物不苟應。務盡其心。之謂大仁。

人而不仁。則道義息也。強暴感仁義而服者有矣。未聞以強暴服強暴而能有終者也。

孝莫大於寧親。寧親莫大於存神。神存天地之間。順其命。勿絕滅之而已矣。死生者身之常也。存亡者國之常也。興廢者天下之常也。絕滅者非常之變也。聖人制四海之命。法

天而不私已。盡制而不曲防。分天下之地。以為萬國。而與英才共焉。誠知興廢之無常。不可以私守之也。故農夫受田百畝。諸侯百里。天子千里。農夫食其力。諸侯報其功。天子享其德。此天下之分然。非後世擅天下者。以大制小。以強制弱之謀也。誠盡制而已矣。是以虞夏商周。傳祀長久。皆千餘歲。論興廢。則均有焉。語絕滅。則至暴秦郡縣天下。然後及也。自秦滅先王之制。海內蕩然。無有根本之固。有今世王天下。而繼世無置錐之地者。有今年貴為天子。而明年欲為匹夫。不可得者。天王尚然。況其下者乎。是以等威不立。禮義難行。俗化衰薄。雖當世興廢之常。而受絕滅之禍也。其為不孝孰大焉。悲夫。秦漢魏晉隋唐之君。真可謂居絕滅之中。而不自知者也。是故大易垂訓。必建萬國。

而親諸侯。春秋立法。興滅國。而繼絕世。義有定體。仁無定用。

道無不可行之時。時無不可處之事。時無窮。事萬變。惟仁者為能處之。不失其道。而有成功。權數智術。用而或中。則成。不中則敗。其成敗。係人之能否。而權變縱釋。不在我者也。豈不殆哉。

天命不已。故人生無窮。具耳目鼻口手足。而成身。合父子君臣夫婦長幼朋友。而成世。非有假於外。而強成之也。是性然矣。聖人明於大倫。理於萬物。暢於四支。達於天地。一以貫之。性外無物。物外無性。是故成己成物。無可無不可焉。釋氏絕物遁世。棲身冲寞。窺見天機。有不器於物者。遂以此自大。謂萬物皆我心。物不覺悟。而我覺悟。謂我獨高乎。

支心肢

胡...知...言

萬物於是顛倒作用莫知所止反為有適有莫不得道義之全名為識心見性然四達而實不能一貫展轉淫適莫可致詰世之君子信其幻語而惑之孰若即吾身世而察之乎

先道而後言故無不信之言先義而後行故無不果之行陰陽成象而天道著矣剛柔成質而地道著矣仁義成德而人道著矣

萬物生於天萬事宰於心性天命也命人心也而氣經緯乎其間萬變著見而不可掩莫或使之非鬼神而何法制者道德之顯爾道德者法制之隱爾天地之心生生不窮者也必有春秋冬夏之節風雨霜露之變然後生物之功遂有道德結於民心而無法制者為無用無用者凶

法制之修為上章 為一佈

類之有法制繫於民身而無道德者為無體無體者滅暴秦之類是故法立制定苟非其人亦不可行也

學進則所能日益德進則所能日損不已而天則所能凶矣事成則極極則變物盈則傾傾則革聖人裁成其道輔相其宜百姓於變而不知此堯舜所以為聖也

造車於室而可通天下之險易鑄鑑於治而可以定天下之妍醜蓋得其道而握其要也治天下者何獨不觀乎此而反求諸身乎是以一正君心而天下定矣

陰陽

胡子曰一陰一陽之謂道有一則有三自三而無窮矣老子謂一生二二生三非知太極之蘊者也 小道任術先其得後其利智已而愚民者也聖人由道而行

其施也博。其報也厚。其散也廣。其聚也多。貪慾不生而天下通焉。

夫婦之道。人醜之者。以淫慾為事也。聖人安之者。以保合為義也。接而知有禮焉。交而知有道焉。惟敬者。為能守而勿失也。語曰。樂而不淫。則得性命之正矣。謂之淫慾者。非陋庸人而何。

作一本

變異見於天者。理極而通。數窮而更。勢盡而反。氣滋而息。興者將廢。成者將敗。人君者。天命之主。所宜盡心也。德動於氣。吉者成。凶者敗。大者興。小者廢。天豈有心於彼此哉。謂之謹告者。人君觀是。宜以自省也。仁義服於吾身。是非明於吾政。雖四海沸騰。三光淪沒。亦不足畏也。已。若以天命為恃。遇災不懼。肆淫心。而出暴政。未有不凶者也。

物之生死。理也。理者。萬物之貞也。生聚而可見。則為有。死散而不可見。則為無。夫可以有無。見者。物之形也。物之理則未嘗有無也。老氏乃以有無為生物之本。陋哉。天得地而後有萬物。夫得婦而後有男女。君得臣而後有萬化。此一之道也。所以為至也。

井法行。然後智愚可擇。學無濫士。野無濫農。人才各得其所。而游手鮮矣。君臨卿。卿臨大夫。大夫臨士。士臨農與工商。所受有分制。多寡均而無貧苦者矣。人皆受地。世世守之。無交易之侵謀。無交易之侵謀。則無爭奪之獄訟。無爭奪之獄訟。則刑罰省而民安。刑罰省而民安。則禮樂修而和氣應矣。

守身以仁。以守身之道。正其君者。大臣也。漢唐之盛。忠臣烈

士。攻其君之過。禁其君之欲。糾其政之繆。彈其人之佞。而止已。求其大君心。引之志於仁者。則吾未之見也。惟董生其庶幾乎。

九道可述不可作。述之者天也。作之者人也。三王述之。五伯作之。其功德可考矣。

十深於道者富用物而不盈。衛公子荆善居室。孔子何取焉。以其心不嬰於物。可以為法也。夫人生於世。用物以成其生耳。其久能幾何。而世人馳騫不反也。

十一維天之命。於穆不已。聖人知天命。存於身者。淵源無窮。故施於民者。溥博無盡。而事功不同也。知之則於一事功。可以盡聖人之蘊。不知則一事功而已矣。不足以言聖人也。莊周乃曰。聖人之道。真以治身。其緒餘土苴以治天下。豈其

然乎

十二善為天下者。務寢兵。兵刑之大者耳。雖漢唐盛主。禮樂廢缺。法令專行。是兵常典而未嘗息也。紀綱如是。而欲有二代之文章。其可得乎。

十三有情無情。體同而用分。人以其耳目所學習而不能超乎見聞之表。故昭體用以示之。則惑矣。惑則茫然無所底止。而為釋氏所引。以心為宗。心生萬法。萬法皆心。自滅天命。固為已私。小惑難解。大礙方張。不窮理之過也。彼其誇大言辭。顛倒運用。自謂至極矣。然以聖人視之。可謂欲仁而未至。有智而未及者也。夫生於戎夷。亦間世之英也。學之不正。遂為異端。小道惜哉。

聖人尚賢。使民知勸教。不能使民不爭。明善惡之歸。如日月

之照白黑然民猶有惑於欲而陷於惡故孔子觀上世之化喟然而嘆曰甚哉知之難也雖堯舜之民比屋可封能使之由而已亦不能使之知也夫人目於五色耳於五聲口於五味其性固然非外來也聖人因其性而導之由於至善故民之化之也易老子曰不見可欲使心不亂夫可欲者天下之公欲也而可蔽之使不見乎天地之生生萬物聖人之生生萬民固其理也老聃用其道計其成而以不爭行之是舞智尚術求怙天下之權以自私也其去王事遠矣

時之古今道之古今也

道者體用之總名仁其體義其用合體與用斯為道矣大道廢有仁義老聃非知道者也

胡子知言卷第一

胡子知言卷第二

好惡

胡子曰寡欲之君然後可與言王道無欲之臣然後可以言王佐

志仁則可大依仁則可久

仲尼從心所欲不踰矩可謂盡心矣天即孔子也孔子即天也釋氏無障礙而所欲不能不踰矩吾知其未見心之全也猖狂妄行而已

有其德無其位君子安之有其位無其功君子耻之君子之遊世也以德故不患乎無位小人之遊世也以利勢故患得患失無所不為

一嗟吸足以察寒暑之變一語默足以著行藏之妙一往來

按此篇首章以載疑義敏政則此章則推第然則胡字亦恐加敏政所

足以究天地之理。自陋者不足與有言也。自小者不足與有為也。

人雖備天道。必學然後識。習然後能。能然後用。用無不利。唯樂天者能之。

有之在己。知之在人。有之而人不知。從而與人較者。非能有者也。

水有源。故其流不窮。木有根。故其生不窮。氣有性。故其運不息。德有本。故其行不窮。孝弟也者。德之本歟。

有是心則有知。無是心則無知。巧言令色之人。一失其心於浮偽。未有能仁者也。

等級至嚴也。失禮樂則不威。山河至險也。失禮樂則不固。禮乎樂乎。天下所日用。不可以造次顛沛廢焉者乎。

富可以厚恩。貴可以廣德。是君子之所欲。有求之而得者。有不求而得者。有求而不得者。命有定矣。信而不渝。然後能為君子。

有為之為。出於智巧。血氣方盛。則智巧出焉。血氣既衰。則智巧窮矣。或知巧之可利。而銳於立巧。或知名之可利。而進以求名。或知正直之可利。而勉於正直。或知文詞之可利。而習於文詞。皆智巧之智也。上好恬退。則為恬退。以中其欲。上好剛勁。則為剛勁。以中其欲。上好溫厚。則為溫厚。以中其欲。上好勤恪。則為勤恪。以中其欲。上好文雅。則為文雅。以中其欲。皆智巧之巧也。年方壯。則血氣盛。得所欲。則血氣盛壯。邁欲失。則血氣挫折。消懦而所為屈矣。無不可變之操也。無為之為。本於仁義。善不以名。而為。功不以利。

巧之立
或曰疑
切字誤
以末之
以或曰
疑於字

而勤通於造化與天地相終始苟不至德則至道不凝焉
聖人不可得而見矣其遺言猶龍之蛇猶虎之皮用其文章
猶足動觀聽况能充其蛇復其皮得其精神以設施於天
下其撥亂興治如反覆手耳不得其道與天下之人角智
力者嶮嶮乎殆哉
有聚而可見謂之有者知其有於目故散而不可見者謂之
無有實而可蹈謂之有者知其有於心故妄而不可蹈者
謂之無
馬牛人畜也御之失道則奮其角踶雖有猛士莫之敢撓得
其道則三尺童子用之周旋無不如志焉天下分裂兆民
離散欲以一之固有其方患在人不知雖與言而不入也
知幾則物不能累而禍不能侵不累於物其知幾乎

而事間
恐脫言
字

郡縣天下可以持承平而不可支變故封建諸侯可以持承
平可以支變故
自觀我者而事至而知起則我之仁可見矣事不至而知不
起則我之仁不可見也自我而言心與天地同流夫何間
之有
處已有道則行艱難險厄之中無所不利失其道則有不能
堪而愈欲興矣是以君子貴有德也
往來
胡子曰或往或來天之所以為道也或語或默士之所以為
仁也或進或退臣之所以事君也或擒或縱兵之所以為
律也或弛或張王之所以化成於天下也
釋氏以盡虛空沙界為吾身大則大矣而以父母所生之身

為一塵刹幻化之物而不知敬焉。是有間也。有間者。至不仁也。與區區於一物之中。沈惑而不知反者。何以異。性譬諸水乎。則心猶水之下。情猶水之瀾。欲猶水之波浪。即物而真者。聖人之道也。談真離物者。釋氏之幻也。釋氏見理而不窮理。見性而不盡性。故於一天之中。分別幻華真實。不能合一。與道不相似也。

當爵祿而不輕行。道德而不吝者。君子人歟。君子人也。天下之臣。有三。有好功名而輕爵祿之臣。是人也。名得功成而止矣。有貪爵祿而昧功名之臣。是人也。必忘其性命矣。鮮不及哉。有由道義而行之臣。是人也。爵位功名得之。不以為重。失之。不以為輕。願吾道義如何。耳。君天下。臨百官。是三臣者。雜然並進。為人君者。易乎知而進退之。孟子曰。

君仁莫不仁

有善行而不仁者有矣。未有不仁而能擇乎善者也。子思子曰。率性之謂道。萬物萬事。性之質也。因質以致用。人之道也。人也者。天地之全也。而何以知其全乎。萬物有有父子之親者焉。有有君臣之統者焉。有有報本反始之禮者焉。有有兄弟之序者焉。有有救災恤患之義者焉。有有夫婦之別者焉。至於知時。禦盜。如雞犬。猶能有功於人。然謂之禽獸。而人不與為類。何也。以其不得其全。不可與為類。夫人雖備萬物之性。然好惡有邪正。取舍有是非。或中於先。或否於後。或得於上。或失於下。故有不仁而入於夷狄禽獸之性者矣。惟聖人既生而後知之。又學以審之。盡人之性。盡物之性。德合天地。心統萬物。故與造化相參而

作萬物一陰陽

主斯道也。不然各適其適。雜於夷狄禽獸。是異類而已。豈人之道也哉。是故君子必戒謹恐懼。以無失父母之性。自別於異類。期全而歸之。以成吾孝也。

中者道之體。和者道之用。中和變化。萬物各正性命。而純備者。人也。性之極也。故觀萬物之流形。其性則異。察萬物之本性。其源則一。聖人執天之機。博叙五典。庸秩五禮。順是者。彰之以五服。逆是者。討之以五刑。調理萬物。各得其所。此人之所以為天地也。

目之所可觀者。禽獸皆能視也。目之所可聞者。禽獸皆能聞也。視而知其形。聽而知其聲。各以其類者。亦禽獸之所能也。視萬形。聽萬聲。而兼辨之者。則人而已。觀形色而知其性。聞聲音而達其義。通乎耳目之表。形器之外。非聖人則

不能與於斯矣。斯道不明。則中國冠帶之君。有時而為夷狄。揚朱墨翟之賢。而有禽獸之累。惟安於耳目形器。不知覺之過也。君子履安佚之地。當安佚之時。戒謹恐懼。不敢須臾怠者。以此。

君子畏天命。順天時。故行驚眾駭俗之事。常中。小人不知天命。以利而動。肆情妄作。故行驚眾駭俗之事。必其無忌憚。而然也。首萬物在天地。謂之正情。備萬物參天地。謂之正道。順秉彛窮物。則謂之正教。

道之明也。道之行也。我知之矣。變動不居。進退無常。妙道精義。未嘗須臾離也。賢者之行。智者之見。常高於俗。而與俗立異。不肖者之行。愚者之見。常溺於俗。而與俗同流。此道之所以不明也。此道之所以不行也。我知聖人之行。聖人

之見矣。不與俗異。不與俗同。變動不居。進退無常。妙道精義未嘗離也。參於天地造化萬物。明如日月。行如四時。我知聖人之行聖人之見矣。

仲尼

胡子曰。仲尼之教。猶天地造化萬物。生日新。無一氣之不應。無一息之或已也。我於季路而見焉。或曰。何謂也。曰。子路衣敝緼袍。與衣狐貉者立。而不耻者。其質美矣。孔子曰。不伎不求。何用不臧。進之以仁也。季路終身誦之力行乎仁矣。孔子曰。是道也。何足以臧。至哉斯言。非天下之至誠。其孰能與於此。顏回欲罷不能。未至文王純一不已之地。孔子所以惜之。曰。未見其止也。止則與天為一。無以加矣。氣主乎性。性主乎心。心純則性定。而氣正。氣正則動而不差。

動而有差者。心未純也。告子不知心。而以義為外。無主於中。而主於言。言有不勝。則惑矣。而心有不動乎。北宮黝。孟施舍。以氣為本。以果為行。一身之氣。有時而衰。而心有不動乎。曾子。孟子之勇。原於心。在身為道。處物為義。氣與道義同流。融合於視聽言動之間。可謂盡性者矣。夫性無不體者。心也。孰能參天地而不物。關百聖而不惑。亂九流而不繆。乘富貴而能約。遭貧賤而能亨。禮儀三百。威儀三千。周旋繫縲。而不亂乎。

人皆有良心。故被之以桀紂之名。雖匹夫不受也。夫桀紂萬乘之君。而匹夫羞為之何也。以身不親其奉。而知其醜行也。王公大人。一親其奉。喪其良心。處利勢之際。臨死生之節。貪冒苟免。行若大鼠者。皆是也。富貴而奉身者。倫。軒良。

勢一作

醜行倒

大也犬

心之利劍也。是故禹菲飲食，卑宮室。孔子重贊之曰：吾無間然矣。富貴一時之利，良心萬世之彛。乘利勢行彛章，如雷之震，如風之動。聖人性之，君子樂焉。不然，乃以一時之利，失萬世之彛，自列於禽獸。寧貧賤而為匹夫，不願王公之富貴也。

以理義服天下，易。以威力服天下，難。理義本諸身，威力假諸人者也。本諸身者，有性。假諸人者，有命。性可必，而命不可必。性存則命立，而權度縱釋在我矣。是故善為國者，尊吾性而已。

君子有素天下之心，裁之自親始。君子有善萬世之心，行之自身始。不然，則蕩而無止，不入於釋氏之絕滅，則入於老莊之荒唐。

有德而富貴者，乘富貴之勢以利物。無德而富貴者，乘富貴之勢以殘身。富貴人之所大欲，貧賤人之所大惡。然因貧賤而修益者多，因富貴而不失於昏淫者寡。則富貴也有時而不若貧賤矣。

赤子不私其身，無智巧，無偏係，能守是心而勿失。然後謂之大丈夫。

惟仁者為能所執，無非禮所行，無非義。今之儒者，移學文藝，于仕進之心，以收其放心，而美其身。則又何古人之不可及哉。父兄以學文藝令其子弟，朋友以仕進相招，往而不返，則心始荒而不治。萬事之成，成不逮古先矣。

學欲博不欲雜，守欲約不欲陋。雜似博，陋似約。學者不可不

察也

修為者必有弃然後能有所取必有變然後能有所成
雖天子之貴不仁不義不能以尊其身雖天下之大不仁不
義不能以庇其身况其下者乎

魚生於水死於水。艸木生於土死於土。人生於道死於道。天
經也。飲食車馬衣裳宮室之用道。所以有濟生者。猶魚有
蘋藻泥沙。艸木有風雷雨露也。如使魚而離水。雖有蘋藻
泥沙則不能生矣。如使艸木而離土。雖有雷風雨露亦不
能以生。今人也。而離道。飲食雖豐。裘服雖鮮。車馬雖澤。宮
室雖麗。其得而享諸。季世淫亂。並興爭奪。相殺殄滅。人倫
至於善良。被禍姦惡相殘。天下囂然。皆失其所。則一人棄
道。崇物之所致也。有國家者。戒之。戒之。養太子。不可以不

慎也。望太子。不可以不仁也。

胡子知言卷第二

胡子知言卷第三

文王

胡子曰。文王之行。王政至善美也。孟子之言。王道至詳約也。然不越制。其田里。導之樹畜。教之以孝弟忠信而已。自五伯之亂。以至於今。田里之弊無窮。樹畜之業不修。孝悌之行不著。忠信之風不立。治道日尙。刑罰日煩。非有超百世英才之君臣。與文王孟氏比肩者。其孰能復之。養民惟恐不足。此世之所以治安也。取民惟恐不足。此世之所以敗也。

江河之流。非舟不濟。人取其濟。則已矣。不復留情於舟也。澗壑之險。非梁不渡。人取其渡。則已矣。不復留情於梁也。人於奉身濟生之物。皆如是也。不亦善乎。澹然天地之間。雖

悌
於

死生之變不能動其心矣

生本無可好。人之所以好生者。以欲也。死本無可惡。人之所以惡死者。亦以欲也。生求稱其欲。死懼失其欲。衝衝天地之間。莫不以欲為事。而心學不傳矣。

有源之水。寒冽不凍。有德之人。厄窮不塞。

以反求諸己。為要法。以言。人不善。為至戒。

行謹。則能堅其志。言謹。則能崇其德。

下之於上。德不待聲色。而後化。人之於其類。不待聲色。而後

從。禍福於善惡。不待聲色。而後應。詩云。民之秉彝。好是懿

德。是故君子篤恭。而天下平。

人固有遠迹。江湖念絕於名利者矣。然世或求之。而不得。免

人固有置身市朝。心屬於富貴者矣。然世或捨之。而不得。

進命之在人。分定於天。不可變也。是以君子貴知命。知命

然後能信義。惟患積德不足於身。不患取資不足於世。

執斧斤者。聽於施繩墨者。然後大廈成。執干戈者。聽於明理

義者。然後大業定。

仁心立政之本也。均田為政之先也。田里不均。雖有仁心。而

民不被其澤矣。井田者。聖人均田之要法也。恩意聯屬。窮

究不容少而不散。多而不亂。農賦既定。軍制亦明矣。三五

之所以王者。以其能制天下之田里。政立仁施。雖匹夫匹

婦。一衣一食。如解衣衣之。推食食之。其於萬物。誠有調燮

之法。以佐贊乾坤化育之功。非如後世之君。不仁於民也。

桀紂秦政。皆窮天下之惡。百姓之所同惡。故商周劉漢。因天

下之心。伐而代之。百姓親附。居之安久。所謂仁義之兵也。

魏晉以來。天下莫不假人之柄。而有廢三綱之罪。仁義不立。綱紀不張。無以締固民心。而欲居之安久。可乎。或問。周室衰。諸侯更霸數百年。及秦累世窮兵極勢。而後定天下。天下已定。其十三歲而凶何也。曰。秦之凶也。久矣。秦自用孝公商鞅之法。勢日張。而德日衰。兵日振。而俗日弊。地日廣。而民心日益散。秦之凶也。久矣。然則賈生謂攻守之勢異。非歟。曰。攻守一道也。是故湯武由仁義以攻。由仁義以守。漢唐以仁義而攻。以仁義而守。子孫享之。各數百年。蓋得其道也。曰。秦失其道。其能定天下。何也。曰。時也。六國之君。其愚又甚於秦。故秦能欺之。以僥倖一時之勝。而凶立至矣。曰。然則漢唐興義師。不五六歲。得天下。定中國者。數百年。季世一失其道。而凶如此。其故何也。曰。井法不

井田封

立。諸侯不建。天下蕩蕩。無綱紀也。後世不改其轍。欲如周獲天年。終難矣哉。三代而後。漢唐之盛。謂愛民而富民之君。則有之。謂愛民而教民之君。則未之有也。

漢唐以來。天下既定。人君非因循自怠。則沈溺聲色。非沈溺聲色。則開拓邊境。非開拓邊境。則崇飾虛文。其下乃有感於神仙真空之術。曷若講明先王之道。存其心。正其情。大其德。新其政。光其國。為萬世之人君乎。後世必有高漢唐賢君之聰明者。然後能行之矣。而漢唐賢君。志趣識量。亦未易及也。可輕棄哉。又况三代之盛。王行一不義。殺一不辜。而得天下。不為者。其仁何可及乎。人君。聯屬天下。以成其身者也。內選於九族之親。禮其賢者。表而用之。以聯屬

人君以下另授

明

其親外選於五方之人。禮其英傑。引而進之。以聯屬其民。是故賢者衆之。表君之輔也。不進其親之賢者。是自賊其心腹也。不進其人之賢者。是自殘其四肢也。殘賊之君。鮮不覆亡哉。

事物

胡子曰。事物之情。以成則難。以致則易。足之行也亦然。升。高難。就。卑。易。舟之行也亦然。流。流難。順。流。易。是故雅言難入。而淫言易聽。正道難從而小道易用。伊尹之訓太甲曰。有言逆于汝心。必求諸道。有言逆于汝志。必求諸非道。蓋本天下事物之情。而戒之耳。非謂太甲質凡。而故告之。以如是也。英明之君。以是自戒。則德業日新。可以配天矣。聖人理天下。以萬物各得其所。為至極。井田封建其大法也。

逆于汝志 必求諸道 必求諸非道 蓋本 一作順

井田封建

者比著

暴君汗吏既已廢之。明君良臣歷千五百餘歲。未有能復之者。智不及邪。才不逮邪。聖道不傳。所謂明君良臣者。未免以天下自利。無意於裁成輔相。使萬物各得其所。邪探視聽言動無息之本。可以知性。察視聽言動不息之際。可以會情。視聽言動道義明者。孰知其為此心。視聽言動物欲引取。孰知其為人欲。是故誠成天下之性。性立天下之有。情効天下之動。心妙性情之德。性情之德。庸人與聖人同。聖人妙而庸人所以不妙者。拘滯於有形而不能通焉。今欲通之。非致知何適哉。

至親至切者。其仁之義也歟。至通至達者。其義之理也歟。人備萬物。賢者能體萬物。故萬物為我用。物不備我。故物不能體我。應不為萬物役。而反為萬物役者。其不智孰甚焉。

行吾仁謂之恕操吾心謂之敬敬以養吾仁非性無物非氣無形性其氣之本乎

釋氏窺見心體故言為无不周徧然未知止於其所故外倫理而妄行不足與言孔孟之道也

其一作

明乾坤變化萬物受命之理然後信六道輪回之說具詖淫邪遁之辭始可與為善矣

氣之流行性為之主性之流行心為之主

殆一作

釋氏有適而可有適而不可吾儒無可無不可人能自強於行履之地則必不假釋氏淫遁之詞以自殆矣釋氏惟明一心亦可謂要矣然真孔子所謂好仁不好學者也不如是豈其愚至於無父無君而不自知其非也哉

物無非我事無非真彼遺棄人間萬務惟以了死生為大者

其蔽孰甚焉

氣感於物發如奔霆狂不可制惟明者能自反惟勇者能自斷

行之失於前者可以改之於後事之失於今者可以修之於來雖然使行而可以逆制則人皆有善行矣使事而可以預立則人皆有善事矣惟造次不可以少待也惟顛沛不可以少安也則行失於身事失於物有不可勝窮者矣雖強力之人改過不憚其如過之不窮何是以大學之方在致其知知至然後意識意識則過不期寡而自寡矣事之誤非過也或未得馭事之道焉耳心之惑乃過也心過難改能改心過則無過矣

能攻人之實病至難也能受人實攻者為尤難人能攻我實

病我能受人實攻朋友之義其庶幾乎不然其不相而為小人者幾希矣

忌克之人其可事乎其急也我諫我聽我才我用禍既息矣我諫諍也我才姦也殺我必矣有天下國家而如是能傳之子孫者未之有也是故不思不克可以為君矣諫不接發才不妄試可以保身矣

喪之三年盡生者之孝心也於死者何加損焉是故漢文雖有命短喪我謂之天下之慈君而漢景不服三年之喪其為孝也薄矣行而有悖於天有累於身雖有父令不可從也從之則成父之小欲而隳父之大仁君子不謂之孝况三年之喪仁人孝子所以事天成身之本非父之所得令者乎後世不罪漢景之薄於親而罪漢文之慈於臣子是

未察乎喪服之志者也

欲大變後世之法度必先大變人主之心術心術不正則不能用真儒為大臣大臣非真儒則百官不可總已以聽而嗣君不可以三年不言母后雖欲順承天意不撓外權不可得矣此不可不大變之本也本正則自身措之百官萬民而天下皆正矣

荀子曰有治人無治法竊譬之欲撥亂反之正者如越江湖法則舟也人則操舟者也若舟破楫壞雖有若神之技人知其弗能濟矣故乘大亂之時必變法法不變而能成治功者未之有也

欲撥亂興治者當正大綱知大綱然後本可正而末可定大綱不知雖或善於條目有一時之功終必於大綱不正之

處而生大亂。然大綱無定體。各隨其時。故魯莊公之大綱。在於復讎也。衛國之大綱。在於正名也。讐不復。名不正。雖有仲尼之德。亦不能聽魯衛之政矣。

紛華

胡子曰。行紛華波動之中。慢易之心不生。居幽獨得肆之處。非僻之情不起。上也。起而以禮制焉。次也。制之而不止者。昏而無勇也。理不素窮。勇不自任。必為小人之歸。可耻之甚也。

堯舜以天下與人。而無人德。我之望。湯武有人之天下。而無我取人之嫌。是故天下無大事。我不能大。則以事為大。而處之也難。

人欲盛。則於天理昏。理素明。則無欲矣。處富貴乎。與天地同

其通。處貧賤乎。與天地同其否。安死順生。與天地同其變。又何宮室妻妾衣服飲食存亡得喪。而以介意乎。

一身之利。無謀也。而利天下者。則謀之。一時之利。無謀也。而利萬世者。則謀之。存斯志。行斯道。躬耕于野。上以奉祀事。長下以慈幼。延交遊於身足矣。易曰。不家食。吉。是命焉。烏能舍我靈龜。而逐人之昏昏也。

仁者人所以肖天地之機要也。

人之於天地。有感必應。猶心之於身。疾痛必知焉。物不獨立。必有對。對不分治。必交焉。而文生矣。物盈於天地之間。仁者無不愛也。故以斯文為己任。理萬物。而與天地參矣。

或問王通曰。子有憂疑乎。曰。樂天知命。吾何憂。窮理盡性。吾

何疑雖然天下皆憂吾獨得不憂天下皆疑吾獨得不疑
 又曰心迹之判久矣吾獨得不二言乎或問曰通有二言
 何也曰仁則知通之言一不仁則以通言為二若心與迹
 判則是天地萬物不相管也而將何以一天下之動乎
 天下莫大於心患在不能推之爾莫久於性患在不能順之
 爾莫成於命患在不能信之爾不能推故人物內外不能
 一也。不能順故死生晝夜不能通也。不能信故富貴貧賤
 不能安也。

事物屬於性君子不謂之性也必有心焉而後能治裁制屬
 諸心君子不謂之心也必有性焉然後能存
 不仁見天下之事大而執天下之物固故物激而怒怒而不
 能消矣感物而欲欲而不能止矣窮理盡性以成吾仁則

知天下無大事而見天下無固物雖有怒怒而不遷矣雖
 有欲欲而不淫矣

莊周曰伯夷死名於首陽之下非知伯夷者也若伯夷可謂
 全其性命之情者矣謂之死名可乎周不為一世用以保
 其身可矣而未知天下之大本也

智不相近雖聽言而不入信不相及雖納忠而不愛是故君
 子必謹其所以言則不招謗誅取怨辱矣

士學於文而知道則關鍵節目之言未嘗不三復也君學於
 政而知道則幾會本原之事未嘗不三令五申也知之則
 因非而知是不知則指是以為非

人君盡下則聰明開而萬里之遠親於衽席偏信則昏亂而
 父子夫婦之間有遠於萬里者矣人君欲救偏信之禍莫

先於窮理莫要於寡欲窮理寡欲交相發者矣

去聖既遠天下無人師學者必因書記語言以知理義之精

微知之則適理義之周道也不然則為溺心志之大害矣

人盡其心則可與言仁矣心窮其理則可與言性矣性存其

誠則可與言命矣

敬則人親之仁則民愛之誠則鬼神享之

窮則獨善其身達則兼善天下者大賢之分也達則兼善天

下窮則兼善萬世者聖人之分也

或問人可勝天乎曰人而天則天勝人而不天則天不勝

學貴大成不貴小用大成者參於天地之謂也小用者謀利

計功之謂也

人者天地之精也故行乎其中而莫禦五行萬物之秀氣也

故物為之用而莫違

三王正名與利者也故其利大而流長五伯假名爭利者也

故其利小而流近

形形之謂物不形形之謂道物拘於數而有終道通於化而

無盡

古之學者求天知今之學者求人知古之仕者行己今之仕

者求利焉

胡子知言卷第三

三三三三三

Faint vertical text columns within a rectangular border, likely bleed-through from the reverse side of the page.

